



UPA 2026/11
21/5-2026
Ida Vahl

2025-mut Nunatta Karsiata naatsorsuutaasa akuersissutigineqarnissaannik siunnersuut.

(Aningaasaqarnermut Naalakkersuisoq)(Siullermeerineq)

2025-mut Nunatta Karsiata naatsorsuutaannik Naalakkersuisut saqqummiussinerinut qujanaq.

Aningaasaqarnikkut akisussaassuseqarneq, Demokraatinut politikikkut tunngaviumik pisussaaffiuvoq. Siunissami nuna tamakkerlugu peqqissutsimut, ilinniartitaanermit, utoqqarnik isumassuinermit, isumaginninnermi suliniutinut, pisariaqartumillu aningaasaliinissanut akissaqarnissatta qulakkeerneqarnissaanut tunngassuteqarpoq. Siunertat pitsaasut naammanngillat. Atugarissaassagaanni isertitaqartariaqarpoq, pingaarnersiuisoqartariaqarpoq, aaqqissuusseqqittoqartariaqarlunilu.

Tamanna pillugu aningaasartuutit, isertitallu ataqatigiissillugit politikkimik ingerlatsissaagut. Pisortat aningaasaataat isumatusaarluta atussavagut, aningaasatigullu tunngavimmik nukittunerusumik pilersitsissalluta. Taamaattoqassappat suliffiit amerlanerusariaqarput, inuussutissarsiutilinnut sinnaakkutit pitsaanerusariaqarput, ilaatigullu aalisarnermit, takornarialerinermit, aatsitassarsiornermit, nukissiuutinit, aallarnisaanermiillu nutaanik isertitaqartariaqarluni.

2025-mut Nunatta Karsiata naatsorsuutaasa takutippaat, IST-mik amigartoorutit 101 millioner koruuniusut. 126 millioner koruuninik amigartooruteqarnissamik missingersuutinit, angusaq 25 millioner koruuninik pitsaaneruvoq. IST-mik angusat 109 millioner koorunik aamma amigaartooruteqarfiuvoq, tassani angusaq 25 millioner koruuninik aamma pitsaaneruvoq. Angusat naatsorsuutigisamik pitsaanerummata pitsaavoq. Kisianni naatsorsuutit suli amigartooruteqarfiunerinut tamanna allannguinnigilaq. Tamanna pimoorullugu tigussavarput.

Isertitat ataatsimut isigalugu naatsorsuutigisamit amerlanerupput. Tamanna pingaartumik soraarnersussutisiassat akileraarutaannik, aalisarnermi pisuussutinut akileraarutitigut aamma suliffeqarfinnut akileraarutinit isertitat amerlanerunerannik pissuteqarpoq. Inuiaqatigiinni aningaasarsiornikkut ingerlatsineq Nunap Karsianut aalajangiisuusoq ersarillinnartumik tamanna takutitsivoq. Suliffeqarfiit naleqalersitsippata, innuttaasullu amerlanerusut suliffeqartillugit ataatsimoorussamik aningaasaqarneq nukittunerussaagut.

Ilutigisaanik qanoq mianernartiginersugut naatsorsuutit takutippaat. EU-mik suleqatigiinnissamik isumaqatigiisummit isertitat ikinnerusut, Namminersorlutik Oqartussallu ingerlatseqatigiiffiutaasa pissarsiaannit akiliinerit ikinnerusut killuanut ingerlatitsipput. Tamanna pillugu siunissami aningaasaqarnissami isertitaqarfiit ataasiakkaat aallaavigisinnaanngilagut. Inuussutissarsiornerup aaqqissugaanera siammasinnerusooq, patajaannerusorlu pisariaqartipparput.



Aningaasartuutit tungaatigut pingaartumik inatsisitigut aningaasartuutit eqqumaffigineqartariaqarput. Atorfininnermi akileraarutitigut ilanngaattissamut aammalu pisortanit soraarnerussutisiaqartitsinermik aningaasartuutit naatsorsuutigineqartumit amerlanerusimapput. Tamakkuupput pingaaruteqarluinnartut inuppassuit ulluinnarni inuunerannut sunniuteqartut. Kisianni tamannarpiaq patsisaalluni aaqqiissut aningaasatigut ataannarsinnaassaaq.

Demokraatit ikiorsiissutinik pisariaqartitsisunut sannginnerulersitsinissaminnut kissaateqanngilluinnarput. Kisianni inatsisitigut atuineq isertitanit sukkanerusumik annertusarneqarpat, tunngaviumik isumaginninnermik pingaartitsinissaq ajornakusoornerulertarpoq. Taamaattumik akisussaassuseqartumik nutarterinerit pisariaqartinneqarput inuiaqatigiinni eqqortumik aammalu aningaasarsiornikkut akisussaassuseqartumik ingerlatsinissaq.

Pingaartitatta Demokraatiniit ilagilluinnarpaat, pisortat aningaasaataat innuttaasunut naleqarnerulersitsisumik atorneqartarnissaat. Peqqinnee, ilinniartitaaneq, meeqqat, utoqqaat aammalu pisariaqartitsinerit pingaartittariaqarpat. Tamatumalu saniatigut allaffissornikkut aqutsinerit, suliassa qarfiit pitsaanngitsut aammalu innuttaasunut sullissineq pitsanngorsarnagu pisuussutinik ataqatigiissitsisut aaqqiissuussat isornartorsiorlugit qiviartariaqarpat.

Kukkunersiuisut nangaassuteqaratik, isorinninnermilluunniit oqaaseqaateqaratik uppernarsaammata maluginiarparput. Tamanna pitsaavoq, suliallu nangillugu sularinissaanut pitsaasumik tunngavissiilluni. Kisianni kukkunersiuisut uppernarsaammata, imaanngilaq siunissami ungasinnerusumi aningaasaqarneq pitsaassasoq. Politikikkut akisussaaffik suli ingerlanneqartuassaaq, aningaasaqarnerput pitsaasumik ingerlalluassappat.

2025-mut Nunatta Karsiata naatsorsuutai missingersuusiarineqarsimasunit pitsaanerupput, kisiannili suli amigartooruteqarfiullutik. Siunissami atugarissaarneq, aningaasatigullu iliuuseqarnissamut kiffaanngissuseqarnissaq qulakkeerusukkutigit nutaanik isertitaqassaagut, inuussutissarsiortut nukittorsassavagut, pisortanilu aaqqiissuusseqqittariaqarnerit ingerlallutigit.

Tassa taanna akisussaassusilimmik ingerlavissaq. Inunnik aamma eqqarsaatiginnittoq. Pitsaasumimmi aningaasaqanngikkaanni kiffaanngissuseq annikinnerussaaq, toqqiissimaneq annikinnerussaaq, kinguaassallu periarfissakinnerussallutik.

Taamatut oqaaseqarlunga innersuussutigaarput, 2025-mut Nunatta Karsiata naatsorsuutai Kukkunersiuinermut Ataatsimiititaliami nangillugu oqaluuserineqassasoq.